


# mainatges d'òc **PLUMALHON**




Gorrin e  
Pipaut



víctimas de la  
pollucíon en Bretanha




Factor de  
guitarra



Tortugas a

l'ostal





Fòtos Fred Lavail e Jérôme Maran


Tèxte Fred Lavail

# Ai una tortuga a l'ostal

**M**'apèli Baptista e ai sèt ans. Lo paire e la maire, totes dos, son veterinaris. Fa que, a l'ostal, i passan bèlcòp de bèstias. Cans, cats, ases e de còps, d'aranhas gròssas. E mai de tortugas terrèstras. Soi ieu que las sonhi.

**I**a mai d'una espècia de tortugas terrèstras. De segur, caduna a son biais de viure e de manjar. Las qu'ai a l'ostal son de tortugas terrèstras europencas. Son las maurescas o las d'Hermann. Lor avèm fach un pargon amb de tresca, que s'escapen pas.

Lor balhi de pelalhas de patanons, de carròtas o qualques tròces de coja o de fuèlhas d'ensalada.



**L**as tortugas son de reptils. La calor dels solelh lor fa besonh per viure. Mas la tortuga es un animal discrèt que li agrada de s'amagar per las èrbas e dins la vegetacion.

Per las noirir, acampi d'èrba. Amassi de treule, de pissalièches o çò qu'apèlan èrba de quatre còstas o aurelha de lèbre, o plantage.

Per las tortugas en captivitat, lo manjar es bravament important. Agachi que siá variat e en rapòrt amb lors besonhs. M'arriba de lor balhar de frucha, de figas per exemple.



Tot còp, lor balhi d'endévias.

Lor agradan e ne son fòlas !



**S**embla que las tortugas s'agraden dins lo pargon. La pròva n'es qu'al mes de junh n'ai vista una cavar un trauc per far lo nis ont pondrà los uòus. Tres meses après, los tortugons sortián. N'i aviá quatre !



**A**près la primièra quinzèna d'octòbre, coma comença de far pus freg, lor aprèsti un abric per passar l'ivèrn. Per las metre a l'acès del freg, preni un tube acaptat de siure, amb una sola dintrada. Quand se seràn endormidas, barrarai la dintrada amb de tela d'aram. Aital, los predators, los rats mai que mai, o d'autres rosigaires lor poiràn pas venir far mal. Aurai pas qu'a esperar que la prima torne.